

Protocol no. 103**Sezzüda da lündeschdi, als 14 lügl 2014****20.00h - 24.00h**

Preschaints: Albert Mayer, Dumeng Jann, Marianne Werro-Lehmann e Marco Fallet (protocol)
S-chüsà: Andri Poo e Men Caviezel causa vacanzas.

Protocol

Il protocol no. 102 da la sezzüda da lündeschdi, als 30 da gün 2014 vain approvà. Ultra da quai ha il cussagl examnià la notizcha d'acta da sia sezzüda dals 8 lügl 2014, pertoccant ün cas da fabrica. Quella vain chattada per buna.

924 021**FABRICA****Jachen Andri Schmidt; nouv local pel remuorch da lat e garascha; parcella no. 981**

La cumischiun ha examinà la dumonda da fabrica e la documainta ais avantman in möd cumplet. Sün proposta da la cumischiun decid'il cussagl d'inviar la dumonda inavant a l'uffizi da planisaziun a Cuaira pel proceder dal BAB.

925 021**FABRICA****Andri Pua; indriz fotovoltaic sül tet da la stalla vers sùd; parcella no. 1040 a Tuols**

La cumischiun da fabrica ha consultà la documainta e tala ais avantman in möd cumplet. Il cussagl conced'il permiss cun vusch unanima.

926 021**FABRICA****Not Vital; nouv atelier; parcella no. 545 a Prà Grond; fanestras da tet – müdamaint dals plans acconsentits**

Ils perits interpreteschan l'intent da fabrica sco bun e cha las müdaziuns previssas pon gnir concessas. Quels valütan dimena las fanestras sül tet sco masüra per clerità da suringiò e na sco lucarnas. La cumischiun da fabrica vaiva valütà las fanestras sco lucarnas. In considerand il fat, chi's tratta qua d'ün'ouvra d'art e na be d'ün solit fabricat decid'il cussagl da conceder il permiss pel müdamaint dals plans acconsentits.

927 620.501.03**Asfaltaziun Via Sinestra (Sent-Bügliöl)****Surdatta da las lavuors**

Davart da l'uffizi da fabrica vain suottamiss la survista da las offertas pretaisas in basa dal proceder a man liber. Il cussagl decida da surdar l'incumbenza a la ditta Implenja Svizra SA, Scuol pel predschi d'offerta, da fr. 102'913.85.

Fusiun dals 6 cumüns / decret da fusiun da la regenza

Il cussagl piglia cugnuschentscha da quel sco eir dal contrat da fusiun agiunt, suottascrit da mincha cumün anteriur.

Tribunal districtual En / dumonda als cumüns dal district per ün local da sezzüdas güdicial

Il local illa chasa cumünala a Scuol nu cuntainta plü. Per l'üna ais s'ha augmantà la quantità da sezzüdas in möd considerabel e per l'otra sto quel adüna gnir drizz'aint in möd cha quel serva lura sco stanza da güdisch e davopro sto lura quel gnir miss in seis stadi oriund. Il güdisch prevezza da pudair fittar ün local per tuot on ed eir da pudair drizzar aint quel in möd chi correspuonda al bsögn cun üna grondezza da ca. 60 – 70 m2. Il cussagl va d'accord da spordscher la varianta cun nossa sala cumünala illa chasa Misoch. In quel sen vain infuormà al tribunal ed ils respunsabels pon examinar quella varianta.

Referendum refuorma dal territori

Davart dal comitè "NA" a la rabgia da centralisaziun vain lantschà als cumüns la dumonda, scha quels voutan sustgnair il referendum cunter la refuorma dal territori suot la guida dal cumün da Conters i'l Partens. Mincha cusglier vaiva sura da ponderar la fatschenda sülla sezzüda d'hoz

Il cussagl decida da na as partecipar a quell'acziun.

Charta davart dal büro d'indschegner Kindschi

Il cussagl piglia cogniziun da quella, cun quala duonna Ursula Kindschi infuormescha sur dal fat d'avair fundà, a partir dals 1. lügl 2014, la ditta "Kindschi indschegners e geometers SA". Sco persuna patentada ais gnü ingaschà l'indschegner e geometer diplomà Stefan Darnuzer da Tavo.

Molocs a Davo Stron / Marius Jenny

Il vain tut cugnuschentscha da l'infuormaziun, dimena cha sar Jenny pretenda, sco basa pellas relaziuns da dret, ün contrat da dret da fabrica.

Il cussagl fixa plüs termins concernent visitas occularas, sezzüdas e la radunanza cumünala, chi ha lö als **14 avuost 2014**.

Als 23 lügl ha il cussagl cun tuot il persunal da l'administraziun e da la gruppa forestala tut cumgià, a chaschun d'ün aperitiv, dals duos giarsuns, Arno Valentin (administraziun) e Bastian Janett, (gruppa forestala), ils quals han conclus lur giarsunadi sülla fin da lügl cun success. Ad els ais gnü ingrazchà per lur ingaschamaint a bönn dal cumün da Sent e gnü giavüschà tuot il bun, success e satisfacziun sün lur vias professiunalas e privatas. Amenduos han pudü tour incunter ün bel regal da cumgià.

L'actuar:
Marco Fallet

Il capo:
Albert Mayer